



Regulativ per il persunal communal

M E S S A D I

dalla suprastanza communal a al cussegl da vischnaunca

Preziada signura presidenta
Preziadas signuras cusseglieras
Preziai signurs cussegliers

El messadi nr. 40 2009/2012 davart il regulativ d'indemnisaziun havein nus gia declarau ils motivs che pretendan ina adattaziun dil regulativ da salarisaziun. Plinavon havein nus era informau sur dalla separaziun denter il regulativ d'indemnisaziun ed il regulativ per il persunal communal. Era quella proposta ei vegnida preparada dalla gruppa numnada.

En concordanza cun la gruppa da lavur constatescha la suprastanza communal che la reglamentaziun vertenta per il persunal communal ei secumprovada. Nus sebasein sin la reglamentaziun cantunala e desistin da crear ina atgna soluziun. Aschia savein nus desister da relaschar numerusas prescripziuns, che corrispundessen pil pli cun il sistem cantunal. Quella reglamentaziun ei secumprovada e nus lein era mantener ella el futur.

Las adattaziuns proponidas sebasan sil suandont principi fundamental:

Leu nua che prescripziuns specialas stipuleschan buca expressivamein enzatgei auter, vala la legislaziun da persunal dil cantun Grischun e las prescripziuns dall'ordinaziun davart la salarisaziun dils scolasts. La surprida dalla sligiazion cantunala porta ina enorma simplificaziun e spargna lavur dubla ed inutila.

Il sistem da salarisaziun actual ei secumprovaus e duei vegnir mantenius. La suprastonza communal sa sedrizzar tenor il dretg cantunal ni tenor la tabella da classas e scalems d'entochen ussa.

Il plan da plazzas vegn suttamess al cussegl da vischnaunca sco part integrala dil preventiv annual.

Resumau constatein nus ch'ei dat neginas midadas da muntada visavi il sistem actual, auter che l'adattaziun dalla competenza alla nova reglamentaziun dada dalla nova costituziun communal. En special eis ei buca previu in augment dil diember da plazzas ed in alzament real dallas pagaglias, aschia che la revisiun vegn buca a caschunar expensas supplementaras.

Quella revisiun vegn predeliberada dalla cumissiun parlamentara, gest sco il regulativ d'indemnisaziun.

Resumau constatein nus che la revisiun pertucca predominantamein damondas formalas senza midadas materialas e finanziaas. Cun quei ch'ei setracta buca d'ina disposiziun cun vigur generala, ha il cussegl da vischnaunca la competenza da decider surlunder, quei tenor art. 36, lit. d dalla costituziun communal.


Proposta

Sin fundament dallas consideraziuns precedentas

propona

la suprastonza communal al cussegl da vischnaunca d'approbar il regulativ per il persunal communal.

Suprastonza communal Disentis/Mustér
Il president: Il canzlist:


Dr. Dumeni Columberg


Andri Hendry

Disentis/Mustér, ils 23 da fevrer 2012

- Regulativ per il persunal communal